

La'ó Hamutuk

Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-3321040 ka +670-77234330 (mobile) email: laohamutuk@gmail.com

Website: www.laohamutuk.org



Komunikadu Imprensa

29 Outubru 2024

La'ó Hamutuk sujere ba Parlamentu atu diskute Orsamentu Estadu 2025 ho Prudente, Kuidadu no Bazeia ba Evidénsia

Sesta-feira, 25 Outubru 2024, La'ó Hamutuk lori ona submisaun ne'ebé deskreve ho ami nia analiza, perspetiva no rekomendasaun konstrutivu sira kona ba Proposta OJE 2025 nian ba iha Uma-fukun Parlamentu Nasionál atu ajuda Distintu Deputadu/a sira nudár baze referénsia ba diskute ho kle'an, prudente no detallu liu iha plenária antes foti desizaun ba aprovasaun. Nune'e hanoin sira ne'ebé ami deskreve ona iha submisaun mak hanesan tuir mai ne'e:

Governu iha hakerek no diskursu sira rekoñese di'ak tebes kona ba urjénsia atu halo investimentu alternativu hafoin mina hodi prevene Timor-Leste monu ba rai-naruk fiskál. Infelizmente, la hatudu iha senáriu proposta OJE 2025, Governu propoin montante biliaun \$2.2 ka sa'e 12% kompara ho tinan 2024 no kontinua aumenta tan iha despeza sira iha futuru.

Ami nota katak alokasaun iha OJE 2025 ba Projetu Tasi Mane -- konstrusaun no rehabilitasaun auto-estrada, baze fornimentu Suai -- kuaze tokon \$40 no kontinua sa'e maka'as iha projesaun sira ba tinan tuir mai, iha 2026 tokon \$145 no tokon \$223 iha 2027, inklui mós alokasaun ba rehabilitasaun aeroportu Suai ho tokon \$1.6 inklui aeroportu Dili ne'ebé finansiamentu sei aumenta iha projesaun sira. Governu gasta ona enerjia no osan barak ba mega projetu, maibé uzu sira la hatudu ba longu prazu, projetu boot hirak ne'e too ohin loron la konsege lori benefisiu ba povu ka ajuda hakbiit ekonomia povu Timor-Leste nian. Tanba sá Governu nafatin fó prioridade?

Preokupasaun seluk mak gastu ba eletrisidade, ami rekoñese katak eletrisidade mós nudár elementu importante ba povu, maibé iha ona urjénsia atu hanoin oinsá setór ida ne'e la bele kontinua depende ba OJE kada tinan liu husi Ministériu Obras Públika hodi fó subsidiu ba EDTL, selu EDTL nia tusan, selu ba kombustivel fosil, inklui aloka liu husi Fundu Infraestrutura ba eletrisidade no RAEOA nian. Ami nota alokasaun husi 2019-2023 nian ho médiu tokon \$146, iha 2024 ho tokon \$174 no proposta tinan 2025 nian kontinua aumenta ba tokon \$202. Kondisaun hirak ne'e hatudu laiha sustentabilidade ba uzu eletrisidade nian, signifika setór ida ne'e seida uk iha kapasidade nato'on atu jere no hamosu reseita.

Presiza halo redusaun iha gastu administrativu no fó prioridade ba setór sosiál no setór produtivu sira, tanba realidade iha despeza OJE 2025 nian, maioria ba kustu administrasaun, subsidiu ba veteranu sira ne'ebé kontinua sa'e husi t\$113 iha 2024 ba t\$207 iha 2025, pensaun ex-titular sira. Ami mós preokupa ho finansiamentu ba instituisaun no empreza públika sira hanesan TimorGAP kontinua hetan alokasaun tokon \$16 ne'ebé realidade nia balansu iha 2023 sei hela tokon \$106, laiha valór atu kontinua aloka osan tan ba instituisaun ne'ebé la fó reseita ba estadu no kontinua promove planu ne'ebé la realistíku ba povu no nasaun TL.

Ami hanoin katak atu resolve situaun rai laran, dalan ideál liu mak eleva produsaun hodi responde ba demanda konsumu rai laran hanesan investe ba iha setór agrikultura atu hametin ita nia soberania ai-

han. Infelizmente, setór agrikultura kontinua la sai prioridade iha nia alokasaun, tanba hetan de'it tokon \$50 ka 2.2% husi total OJE 2025. Ami hanoin katak, Governu tenke sériu duni atu investe ba setór produtivu sira atu nune'e bele resolve asuntu barak hanesan redús taxa malnutrisaun, inseguransa ai-han, dezempregu no dependénsia boot ba ai-han importadu sira (importasaun ai-han aumenta 14.5% kada tinan dezde tinan 2019¹).

Aleinde ne'e, haktuir ba informasaun proposta OJE 2025 nian, hatudu total empréstimu tokon \$1,024 ne'ebé kontratu ona no foin dezembolsu tokon \$259 até tinan 2023 nia rohan. Iha tinan 2025 Governu sei selu tusan hamutuk tokon \$26, atu sa'e ba t\$40/tinan iha tinan 2028-2029. Bareira foun atu fó dalan ba Governu foti tusan mak tokon \$850 iha 2025. Maske empréstimu hirak ne'e define periodu grasa no tempu ba selu fali até tinan 2062² no seluk sei hahú selu hafoin asina kontratu foun iha 2025. Maibé tenke klaru ba motivu husi tusan hirak ne'e, oinsá Timor-Leste bele selu bainhira laiha Fundu Petrolíferu.

Ba konteúdu sira ami temi antes, ami mós hato'ó sujestaun no rekomendasaun sira ba Parlamentu Nasionál no Governu hanesan tuir mai.

1. Ami sujere Governu redús gastu sira ba projetu boot no gastu la nesesáriu sira iha despeza administrativa, hanesan despeza ba projetu boot sira hanesan auto-estrada, aeroportu Suai, Suai Supply base no mega projetu inklui gastu hirak la eficiente no efikás. Nune'e ami rekomenda atu Governu harii infrastrutura ida ne'ebé fó duni benefísiu ba povu tomak hanesan estrada rural qualidade no uzu ba tempu naruk, instalamentu sistema bee ne'ebé adekuaudu hodi korresponde ba nesesidade báziku, harii infrastrutura no facilidade ne'ebé qualidade no ekitável ba edukasaun no saúde iha munisípiu hotu, liu-liu área remota.
2. Ami sujere ba Parlamentu Nasionál ho sira nia kbiit tomak haree fali gastu administrativu ba instituisaun públiku sira ne'ebé kontinua hetan subsidiu boot husi OJE kada tinan, ne'ebé realidade sira rasik seidak fó reseita significativu ba estadu. Seluk, ami mós sujere atu Governu haree didi'ak fali ba subsidiu pesoál hanesan ba veteranus no ex-titulares sira ne'ebé hatudu tendénsia aumenta kada tinan.
3. Ami sujere ba PN atu husu klarifikasaun ba Governu kona ba motivu husi tetu empréstimu nian ne'ebé boot tebes, maske iha redusaun ba empréstimu setór esensiál, tendénsia empréstimu boot sei finansia ba setór estrativa, no presiza klarifikasaun kle'an husi Governu ba kapasidade estadu nian atu reembolsu fali tusan sira ne'e bainhira ita laiha ona laiha Fundu Petrolíferu.
4. Setór esensiál sira ne'ebé liga ba ema nia moris, hanesan saúde, edukasaun no bee/saneamentu, kontinua la sai prioridade, no hetan de'it menus 19% husi despeza hotu iha proposta OJE 2025. Maske Governu iha deskrisaun sira temi dala barak kona ba investe iha ema no kondisaun sosiál sira, realidade hatudu setór hirak ne'e lakon oportunidade. Ami hanoin katak Governu presiza hanoin sériu no ba longu prazu iha sira nia planu programa, no tenke duni fiar katak investe iha ita nia ema mak solusaun justu liu hodi prepara ita nia jersaun ida ne'ebé reziliente, matenek no produtivu liu.

Ba informasaun detallu liu kona ba submisaun no proposta Orsamentu Estadu ne'e, bele liga ba link: <https://www.laohamutuk.org/econ/OGE25/241025LHSubOJE2025te.pdf> no atu klarifika asuntu balu liga ho submisaun bele liga ba +670-77234330.

¹ Relatóriu Trade Estatística pájina 9, liga ba: <https://inetr-ip.gov.tl/2024/10/10/annual-trade-statistics-2023/>

² Tabela 30, pájina 85, Relatóriu, versaun português